

De Monn midda long Stong

Im Alder ma sisch oft entsinnd,
was ma erlääbt had so als Kind.
Die scheenschd Erinn'rung - 's wird jedem so gehn –
is die onn e froh Juchend gewääñ.

War die Schul aus, was fa e Bläsier,
Aufgabe gemach unn dann raus vor die Dier.
Hupsheisjer honn mir gemold, sinn Sääl gesprung,
honn Ringelrose gespield unn laud gesung.
Die Buwe honn middem Drohddriger die Räafe gefiert,
Donzkneppe mappa Geischel dursch die Strooß bugsierd,
sinn uff Stelze gelaaf, honn Fußball gefubbd,
uns Määde honn se onn de Hoor gezubbd.
Om libbschde awwer honn mir all
Glinger gespield, das war unsa Fall.
Die Buwe honn Lähmdreggade fabriziert
unn dofoor unsa scheen Glaskuchele kassiert.

Awwer wenn's duuschda wor is, doo war's onn da Zeid,
doo war die Spielerlei rum fa heid.
Denn jetzt war de Monn midda long Stong in Sischd,
der gesorschd hadd fa es Strooßelischd.
Doo honn mir gewissd, was es hadd geschlah,
weil uff die Minudd imma pinktisch war.
Mir honne begrießd unn middem geschwäztzt
Unn sinn donn im Karacho hemmwärts gewetzt.

Onn äänem Owend, dunkel war's schunn,
is der Londondermonn nitt reschdzeidig kumm.
Was honn mir doo hin unn här iwwaleed,
ob er vielleischd gar nimmeh kumme dääd.
Schließlisch issen schunn ald, konn nimmeh gudd gehn!
Doch plätzlisch siehn mir ne hinna uns stehn.
„Ei, joo, bin isch ald.“ Mir gugge vawunnerd.
„Isch bin nämlisch noch aus em vor'sche Johrhunnerd.“

Heit honn isch ma moo so moi Gedonke gemach,
wie das wohl is, wemma jede Dach
morjens unn oowens, ob Winder, ob Summer
imma laafe muss, Bersch ruff unn Bersch runner.
Unn doch war er imma gudd druff, de Londondermonn.
Isch muss sahn, doo denk isch mit Ehrfurschd drohn.
Er war e Mensch middem gudde Gemied,
vunn denne ma heit, glaab isch, nimmeh viel siehd.

Doch die Zeid, sie is nitt stehn geblieb.
Ball honn mir es Johr 2000 geschrieb.
Johrhunnerdwenn, doo war was los!
Doo is gefeiert woehr gonz groß.
Unn inner still Minudd, doo fiel mir inn,
dass isch jetzt aach aus em vor'sche Johrhunnerd bin.

